

*les Philosophorum optimus.* His tandem omnibus, si quis recens defunctus est, subjicitur *consolatio*, additur quoque de *liberis, discipulis, posteris*: quod fecit *B. Ambrosius* in funere *Theodosij*, *Ergo tantus*, inquit, *Imperator recessit à nobis, sed non totus recessit: reliquit enim liberos suos, in quibus eum debemus agnoscere, & in quibus cernimus & tenemus.* Intelligit autem *Honorium & Arcadium*, qui *Patri* in imperio successere.

Atque methodus hæc, ut ut vulgaris videatur & scholam redolere, uti loquitur *Vossius*, usitatissima est tamen *Vitarum* scriptoribus & antiquis & recentioribus, uti & parentantibus. Certè *Suetonius Tranquillus* in *Augusto* & ab ejus genere cœpit & in ejus obitu finiit.

De hoc Imperatore dicturus est noster *GÖBELIUS*, nos, ne ipsi aliquid præripiamus, unum aut alterum ex *Augusti jocis*, prout chartæ suppetierint, huc ponemus, & quidem ex *Macrobij Viri Clarissimi. & Illustris lib. Saturnal. II. cap. IV.* cujus hæc sunt verba, *Augustus Caesar affectavit jocos, salvo tamen majestatis pudorisq; respectu, nec ut caderet in scurram.* Digna tanto Principe commendatio, necessaria quoque ad alios doctrina. I. *Ajacem* Tragœdiam scripserat, eamdemq; quòd sibi displicuisset, deleverat: postea *Lucius* gravis tragœdiarum scriptor interrogabat eum, *quid ageret Ajax suus?* Et ille, *In spongiam*, inquit, *incubuit.* Festivo in *Ajacis Telamonij* obitum lusu, qui gladio suo incubuit, cùm ab *Ulysse* in armorum judicio superatus fuisset. Confer *Sueton. cap. XXXV. II.* Cùm ei quidam libellum trepidus offerret, modò proferens manum, modò retrahens, *Putas*, inquit, *te assem* (stipem, σμικρότατον νόμισμα) *elephanto dare?* *Sueton. c. LIII.* Molestum erat principi optumo, quod tanto metueretur opere. III. *Pacuvius Taurus* congiarium ab eò petebat dicens, *Jam homines vulgò loqui, non parvam sibi ab Augusto pecuniam datam fuisse, Sed tu*, subjecit, *noli credere.* *Vulgarius* dixisset & absque sale, *Non dabo.* IV. Eundem expressit colorem in sequenti, *Alium præfecturà equitum summorum & in-*  
super